



NEarchus primogenitus fuit Ingonis Regis Suetiæ. Hic post patris fata in utroq; regno Gothiæ & Suetiæ intra patriæ antiquissimos fines successit, atq; tanta iustitia & clementia subiectis populis imperavit, ut ob summas uirtutes non solum optimis principibus, sed ipsis Dijs similis haberetur. Siquidẽ regna ipsa à prudentissimoparente pacifica accepta, in summa tranquillitate cõseruauit. Proinde nec alijs in circuitu populis bellũ intulit, nec ab alijs illatum sustinuit. Hic tandẽ moriens, Ingonem fratrem in regno successorem habuit. Claruit circa annum Christi ducentessimum nonagesimum, Ioan. Mag. lib. 7. cap. 12.